

卷合三十三卷孝先傳鄭思遠又傳兄太子少傅海安君字孝
爰孝爰付子護軍悌悌卽抱樸子之父抱樸從鄭君盟鄭君授
抱樸於羅浮山去世以付兄子海安君至從孫巢甫以隆安之
末傳道士任延慶徐靈期等世世錄傳支流分散孳孕非一此
大運之通應根而作者因緣冥會乃神明之意有心君子可以
取焉

三寶雜經出化序

夫眾先元起資乎本真本真清凝淵靜湛體常住無去來
相自古及今其名不去無形無名爲萬物之宗矣三元經謂之
眾生真父母者也我之所生乃是因緣和會寄胎父母耳眾生

道藏輯要

雲笈七籤

三

參集一

靈照本資真父母而生但以本性既微未能照見爲塵勞所惑
遂便有身有身之患萬累生焉是以轉輪五道還源靡遂因以
本性相資靈照本同皆有智性卒莫反真聖人興慈父之悲愛
同赤子隨宜拯濟使之離苦得無爲之樂是以三洞及諸法門
隨其所好而開令其解脫解脫所由蓋緣能悟悟則受行能棄
俗法安神無爲得不死術若有智者能爲諸人解暢經旨使長
迷反曉者其福可量乎余未染道服披尋經教求之意緒度脫
彷彿輒述三寶出化所由并訓解經卷數篇辨諸疑惑以擬有
道君子述作而已不敢遠其中道植訓乖謬覽者詳焉

天尊老君名號歷劫經略